









# RAILLERIE

DE

GROS GVILLAYME :

Sur les affaires de ce temps

---

M. DC. XXIII.

THE NEWBERRY  
LIBRARY

Case

F

39

.326.

16239a

RAILLERIE DE GROS  
G V I L L A V M E .*Sur les affaires de ce temps.*

**H**Ola Bourgeois, hola, c'est asses mangé de poix: ne cesserez vous jamais de manger des espinars? vous vous nourrissez d'herbes comme les oysons, & si ie pense qu'apres vostre mort vous vous farcirez le cul comme les Oyes. A quoy pensez vous? parbieu, pendant que vous fairez vos fricassees à la fausse d'Allemaigne, il y en a qui vous veulent roigner les ongles & vous empescher de manger du pain de Gonnelle, on vous taille vos morceaux de bien pres, vous ne beurrés plus de bon vin d'Andresi & d'Argétueil qu'il ne vous couste bien cher, encore basque si le beurre de Vanue ne manque point, ie voy quelque renfrongné, aussi suffisant comme monsieur la Fontaine mon maistre, qui barbouillant entre ses dents, s'eston-

A ij



ne dequoy ie me melle: il a grand tort,  
 de me blasmer deuant que de me co-  
 gnoistre: sçait-il pas bien que s'il ne  
 void plus de bled à Paris, que la farine  
 feroit bien chere: Et puis dequoy me  
 barbouillerois-je d'ancre? Parbieu le  
 temps en est passé, chacun m'appelle-  
 roit coyô, i'aimerois mieux auoir mô  
 visage enluminé de merde. Au reste,  
 vous estonnés vous si i'ay de l'interest  
 au beurre de Vanue, ma foy si i'en eus-  
 se mangé que de l'huile en Careme,  
 vous ne verriés pas des farces à si bon  
 marché, ie vous ferois payer le restes-  
 sissement de mon pourpoint: Car le  
 mesme qui contient vn gras Guillau-  
 me, en tiendroît bien quatre maigres,  
 & huit au bout. Ouy, ouy, i'y ay de  
 l'interest, si on s'amusoit à aller yron-  
 gner aux portes, adieu l'Hostel de  
 Bourgogne: pour moy, ie ne suis  
 point seditieux, i'aimerois mieux gai-  
 gner quatre escus par iour, & boire  
 tout mon saoul à la Croix verte durât  
 la paix, que de mourir de froid sous  
 vne tente en temps de guerre. Que



5  
diable pensés-vous que ce soit que la guerre? vous voudriez bien le sçauoir mais ie ne sçay si ie dois vous le dire. A boire : car la verité consiste au vin, & ma science ne gist qu'en la bouteille, & puis ie vous descouriray sommairement de ce qu'il me semble de la guerre & de la paix.

Premierement vous parlez de la guerre, & d'aller à la Valtoline ou à la Rochelle. Distingo, il y a plusieurs sortes de guerres, & pēsés vous que toutes les guerres qui se font au monde, ressemblent aux guerres du Marquis d'Ancre, ou vous alliés aux portes iouer à la courte-bouille, vous battre à coups de poings, & disputer contre les pots & les bouteilles : Il est vray, que quand vous retourniez en vos maisons vous estiés plus forts, pource que pendant que vous faisiez sentinelle, vos femmes faisant sentinelle à cul levé, vous armoient mieux que ne font les Cerfs dās le bois, & de cornes plus aduantageuses : Mais ie n'appelle pas guerre ciuille qui se fait du cul & de la

bouche, c'est guerre quand on se bat à coups d'espees, & que ces grosses boules de canon emportent les testes des personnes : on me pourra dire, uous n'avez non plus de courage que les autres, uous ne receuez point de coups? ie reçois des pistolles de par bieu qui sont bien meilleures, & puis mō corps est muny de tant de perfection, que ce ne seroit qu'amuser le tapis, d'aller au combat, parce que mille espees ne le peuvent trauerfer : il est uray, que tant plus un mur est espais plus il resiste, & mon uentre farcy de souppe est à l'espreuue du pistollet : pour ma teste, c'est à faire à des cerueaux legers de se laisser emporter aux boules de canon, pour moy ma ceruelle est trop lourde, & mon imagination trop solide pour s'esbranler à si petit uent, aucunes fois i'ay esté à six lieues loin de Senlis quād les Ligueurs l'assiegeoiet & qu'on tiroit tant de canon que tous les diables, sans que neantmoins cela m'aye peu perdre, ny seulement interrompre mon premier somme. Sçaués

vous quand ie suis bien tost resueillé,  
 c'est lors que ie me suis amusé à iouier  
 la nuit, & qu'il m'arriue apres auoir  
 bien desieuné, que ie m'endors sur le  
 midy : alors on commence à remuer  
 les plats, dont le doux cliquetis me  
 batant aux oreilles me resueille aussi  
 tost, pour faire vn sault perilleux du  
 liét à la cuisine: il est vray qu'il n'y a  
 pas beaucoup loin, pource que voulāt  
 inciter nostre petit barbet, qui garde  
 fidellement la marmitte, ie me couche  
 tousiours dans les cendres pour dor-  
 mir mieux à mon aise: Mais ie ne me  
 suis pas mis en discours pour vous en-  
 tretenir de ces niaiseries, ie ne feray pas  
 de peu de chose si grand cas: Il est que-  
 stion de traiter vne bien autre matie-  
 re qui est la guerre: La guerre, ô chose  
 espouuentable! quand on ne sçauoit  
 mourir sans qu'il en couste la vie. O  
 guerre qui enrichist les vns & appau-  
 urist les autres! O guerre qui agrandit  
 les vns & rabaisse les autres: O guerre  
 qui fais tort à l'vn & profit à l'autre:  
 que tu es meschante, ie voudrois le

rencôtrer, ou mon cousteau passeroit,  
 ou ie luy donnerois au sixiesme bou-  
 ton. Combien de filles durant la guer-  
 re se laissent violer volontairemēt de-  
 dans Paris : combien de corps sont  
 donnez à la traaverse: combien de pau-  
 ures vilageois debitent leur froment  
 & leurs bleds plustost qu'ils ne vou-  
 droient: malheur par qui la guerre ar-  
 rive, pour moy ie ne suis point querel-  
 leux, aussi ne seray ie iamais qu'un co-  
 quin: car en ce temps cy il n'y a que les  
 turbulents & les brouillons qui l'em-  
 portent: mais le diable les emporte  
 bien souuent aussi. Or voulez uous  
 scauoir, selon mō aduis, qui sont ceux  
 qui causēt la guerre? il me semble que  
 ce n'est point d'autres gens que ceux  
 qui ne peuuent bien faire leur profit  
 durāt la paix, & qui se plaisent à brou-  
 iler les cartes afin de faire fredon. A ce  
 propos, il me souuient d'une plaisante  
 & serieuse similitude que Gautier Gar-  
 guille recitoit l'autre iour, disant, que  
 les chats ne sont iamais si aysees que  
 quand on demesnage, pource qu'il  
s'eschappe



s'eschappe tousiours quelque bonne  
 lipée en arriere par la negligence de la  
 chambriere, & si lors qu'on oste les  
 meubles, les rats & les souris demeurēt  
 à descouuert, & sont bien plus aysees  
 à prendre. Qui sont les gros matous  
 qui ne demandent que remuē mesna-  
 ge? ce sont ces gros milours aux pat-  
 tes engluées, lesquels ne demandent  
 qu'à chicaner, & prendre tout en vn  
 iour ce que les pauvres petits larron-  
 neaux de rats ont amassé tout le tēps  
 de leur vie. Quand la guerre est, point  
 de chambre des Comptes, point de  
 Justice: combien de gens y gagnent  
 aux despēs des autres. Les Officiers de  
 chez le Roy font tant d'extraordina-  
 res, les seruiteurs demandent tant de  
 recompence, les Controolleurs font  
 de si belles parties, qu'à la fin il se trou-  
 ue que la guerre ne fait que contre le  
 Roy, & à la ruine de ses fināces. Com-  
 bien depuis peu de temps auons nous  
 veu de leuees de bouclier? & à quoy  
 seruir? contre qui faisoit-on la guerre?  
 Les Capitaines & les Chefs guerro-

yoiēt la bourse des riches Laboureurs  
 les soldats faisoient la guerre aux filles  
 & les gouziats se geloient au coin d'un  
 buisson, attēdant qu'il passast quelque  
 pauvre poule pour l'estropier, cela n'est  
 il pas beau au pris des'entretuer l'un  
 l'autre? il faut bien qu'ils l'ayēt trouué  
 bon puis qu'ils veulēt retourner: mais  
 garde la teste, le retour est pire que ma-  
 tines: ils prennent vn pretexte qui est  
 de pauvre effect, d'aller chercher la  
 guerre dela les monts, cela est dange-  
 reux, il vaut mieux assieger le bastion  
 d'un pasté de goudiueau & y monter à  
 la breche. Par bieu encore que i'aye  
 bien du mal & de la peine, ie ne mur-  
 mure point contre mon maistre, qui  
 aime mieux Turlupin que moy. Mais  
 pour dire la verité, nous sommes des  
 fols de no<sup>r</sup> amuser aux affaires d'Estac  
 c'est ce qui gaste tout. Si les Moines ne  
 se mesloient que de chanter, les Pre-  
 ftes de confesser, les Predicateurs de  
 prescher contre les vices, les Docteurs  
 de disputer de langue (ce n'est pas que  
 ie vueille dire qu'ils prennent les armes

non) & les Comediens des farces, par bieu nous n'aurions pas tant de mal: Mais à cet heure on respondra, c'est la mode, il n'y a personne qui n'y mette le nez, il n'y a si petit frere coupechou qui ne vueille entrer au Louure, il n'y a haragere qui ne se messe de parler de la guerre & de la paix: les crocheteurs au coin des ruës fôt des panegyriques & des inuectiues: l'un veut aller à Fontaine-bleau porter son aduis, l'autre veut faire bouillir la marmitte à Paris Ha que vous estes fols, laissons tout cela, rotissés vos harancs, & chastrés vos fagots de par le diable. Les grâds s'accordent tousiours bien, les petits qui sont si fols que de se messer de leurs affaires paruiennent à la fin: mais c'est au bout d'une potence. Iamais le Royau-  
 me n'a esté plus florissant que du tēps du feu Roy, pource que dans sa seule ceruelle se contenoïēt toutes les affaires d'estat. Personne ne murmuroit, personne ne causoit, chacun viuoit ga-  
 yement de son mestier. Mais despuis que les Moines ont esté à cheual, que



les huguenots ont fait des synodes, que les Religieux sont deuenus marchands & banquiers, par bieu nous n'auons eu que mal. Vn pauvre malostu d'advocat attendant qu'on luy apporte dans le Palais quelque cause à perdre, se promeine, discourant des affaires d'estat, tantost de cestuy-cy, tantost de cestuy là, mesdit de l'un, dit bien de l'autre. Aristarque les actions d'un chacun, & pense que son opiniõ est plus valable, & son iugement plus solide, la ceruelle mieux tymbree que celle du Roy ny de tout son Conseil. P'entends ce me semble vn vieil Advocat crotté, ses lunettes en main, son sac & la queue de l'autre qui se tourmente, se travaille l'esprit, que fera le Roy ? mais on luy ferme le passage de l'Italie, l'uillers est pris de l'Espagnol, n'est-il pas temps de se releuer, l'Angleterre s'est vnüe avec l'Espagne, le Roy n'a point de finace, vn Procureur afferé dira, au diable l'Espagnol, nous auons bien affaire de guerre, la bourse se desgarnit, murmure contre le Roy, puis en fin se con-

sole & dit, nous aurons du mal, il nous  
 faut payer vne grand somme d'argent  
 mais aussi les guerres feront tant de  
 procès, tant de pauures vilageois rui-  
 nez. Pendant que monsieur le Procu-  
 reur se fasche en la salle du Palais, les  
 gros larrons se promeinent en bas sur  
 la place, disent. Dieu mercy bõ temps  
 Dieu vueille que le Roy pardonne à  
 ses ennemis, afin que dās peu de tēps  
 ils puissent encor rebrouiller les cartes  
 vn Gentil-homme à qui i'auois dōné  
 de l'argent sur gage a esté tué, l'enfei-  
 gne de diamant m'est demeuree. Lau-  
 tre dit, par bieu bon le party de la rece-  
 pte de l'argent n'est pas mauuais, nous  
 pourrons racler quelque chose. Vn au-  
 tre haussant les espaules dit. Ma foy il  
 n'est riē tel que de pescher en eau trou-  
 ble, nous presterons force argent, les  
 interests seront grands, nous aurons  
 les hardes de beaucoup de noblesse  
 qui s'iront hazarder à la guerre, & se  
 rourmēter pour prendre quelque ma-  
 ladie, cependant que nous mangeons  
icy à nostre ayse, & boirōs à leurs bon-

nes graces, apres auoir decreté leurs maisons & vendu tous leurs biens.

Voila comme chacun ne songe qu'à son profit, & qu'aujourd'huy pour vn fol la pluspart trahiront & leur ville & leur Roy, d'ou prouient celà? c'est que sa bôté le fait mespriser. Ma foy quād ces gens auroient esté vn peu chastiés, ils n'en vaudroient que mieux. Pour moy, si l'on me demande ce qu'il me semble du temps, ie vous iure qu'il cōmence à faire chaud, & que lan petit nous l'auoit predict. Ceux qui sont aupres du Roy, ie leur conseille de s'y tenir, & ceux qui ont de l'argent de le garder, & se rire des autres, qui tenet teneat possessio valet. Ils seroient bien fols, quand le Roy leur donne quelque chose s'ils le iettoient, il n'est si bel acquest que de don. Qui fait bie trouue bien, le Roy a assés d'esprit pour cognoistre ce qui est à faire, sans estre suiet à rendre compte de ses actions à ces Messieurs là. Ho que i'espere bien que mō party sera le plus fort: pource que le Roy est de mō costé, iama<sup>s</sup> on

ne manque estant appuyé de luy, tous  
 tous ces brouillons, ces traistres, nous  
 prepareront bien tost vn beau suiet  
 de Tragedie Dieu aidât, dont ils ioue-  
 ront la catastrophe sur vn beau Thea-  
 tre & en belle compagnie. Ha! que ie  
 les verray secouer de bon courage ces  
 matins qui veulent manger le bled en  
 herbe, ie m'estônois bien s'ils estoient  
 si long temps sans remuer, l'hiuer les  
 en empeschoit: mais à ceste heure qu'il  
 fait bon piller le bon homme: ils re-  
 uiennent avec les hyrondelles: mais  
 garde qu'auant que l'Esté soit passé,  
 on ne les enuoye chauffer en l'autre  
 monde. A propos, on fait courir le  
 bruit que les Anglois auoient mis le  
 pied à terre en France, & que le Prin-  
 ce de galle auoit passé à Paris: mais  
 si cela est, ils feront bien de se retirer.  
 les oysons ne scauroient nager sur  
 terre, ils faudroit qu'ils prissent leurs  
 mittaines pour prendre Calais, en-  
 cores auoient-ils bien froid aux  
 doigts. Quoy que s'en soit, il vaut  
 mieux vne mauuaise paix, qu'vne



bonne guerre. C'est tout ce que ie  
sçay de nouueau : car ie ne veux rien  
dire d'auantage peur d'estre battu. La  
souple me haste, i'entens desia ma  
maistresse qui m'appelle. Adieu bon-  
nes gens, encore que ie pense qu'il n'y  
en ayt gueres.

F I N.









